

四庫全書

史部

欽定四庫全書

史部

名臣經濟錄卷十四至  
六

詳校官檢討<sub>臣</sub>德生

編修<sub>臣</sub>裴謙覆勘

總校官知縣<sub>臣</sub>楊懋珩

校對官中書<sub>臣</sub>范鏊

謄錄監生<sub>臣</sub>戴祖覃

欽定四庫全書

名臣經濟錄卷十四

明 黃訓 編

內閣

題內降疏 徐溥

前日欽蒙發下揭帖一紙內開欽天監致仕監正李華  
令臣等擬旨著復職管事臣等看得李華係傳奉官禮  
部叅奏行事乖謬致仕況已年老今一旦無上事忽然

傳出著復職管事未免驚駭衆聽且皇上登極以來凡百除授陞遷俱是合于衙門題奏請旨未有自內傳出者今又輒開其端誠恐奔競干請之徒紛然而起後來難以止塞其於治道不無有損若李華果於選擇昌國公張巒葬地與有勞力亦當工完之日量與賞賜為宜況本監見有監正吳昊掌印一衙而設兩正官亦為繁冗臣等叨承朝廷委任一事不敢阿從易曰君子作事謀始蓋凡事謀於其始則易為力倖門一開則引例希

求者無所不至矣臣等愚見如此伏乞聖明採納不勝幸甚

李東陽年譜錄

時有旨免日講公等上疏曰經筵日講皆祖宗朝良法美意所在而日講尤切謂之日講者蓋逐日之義欲其工夫接續義理貫通以為政令之法程治化之根本也今天氣和煖正是講學之時臣面受先帝顧命惓惓以常請讀書為諭追思及此涕淚滿襟惟欲少効微勞以

圖補報若不昧死懇請則負先帝顧託之隆孤皇上倚毗之重罪當萬死無以自逃矣上未報五月上復不豫數日平復視朝公等上疏曰臣等備員保傳叨寄腹心論道輔德臣之職也安上保邦臣之願也先於三月二十四日恭聞聖體違和暫免朝叅數日近於五月十三日又聞聖體欠安臣等神竄飛越寢食不寧犬馬私情莫知所措再經數日乃得瞻拜天顏不勝欣躍而喜幸之極轉生憂懼謹昧死上陳仰惟皇上英資洞達聖性

剛明直可超邁百王齊光列聖但恐天時地利偶失其  
宜倉卒之間慮所不及蓋自端陽前後金鼓炮火之聲  
徹于都邑廐牧園役之徒充于宮禁此皆衆耳衆目所  
共聞見大臣畏忌而不敢諫小臣震懾而不敢言臣等  
若再緘口括囊旁觀坐視則祖宗分職以設官朝廷縻  
祿以養士亦將焉用之哉昔漢司馬相如諫擊熊豕以  
為遇逸材之獸駭不存之地與不及還轅人不暇施巧  
雖萬全而無患非天子之所宜近也張猛諫御樓舡以

為乘舡危從橋安聖王不乘危史冊書之皆稱美事臣等不能親侍輦轂又不能先事格心前日之事萬有一失臣等分固當死死而有知何以見先帝之面乎幸賴廟社神靈天心仁愛聖躬康復國祚隆長此正聖心感悟之機天下蒼生之福也伏望皇上念萬乘之尊思萬幾之重體萬民仰戴之切為萬代悠久之圖視朝加早則炎暑不侵進膳有時則元氣日盛于以導迎和氣坐致太平推之天下人民無不得其所者則大廷奏事不



過數刻之勤而燕處深宮自有無窮之樂矣聖旨卿等說的是皆為天下社稷臣民朕已知了

急皇儲疏

李東陽

臣等備員輔導叨任三孤或膺受顧命或荷蒙簡任瘝官竊祿積有歲時徒抱朴忠畧無寸補深慮過計寢食靡寧近日以來恭遇陛下洞啟聖心勵精新政大奸已去羣弊漸消孝理方隆仁恩誕布天下之人欣欣相告皆以為太平之治可指日而致也但事有關於國家社

稷至重至大者臣等若知而不言言而不盡則是緘默容身因循誤國生無以報陛下知人之鑒死無以見先帝在天之靈所謂顧命者為虛名而輔導者皆餘事也臣等竊惟天下者祖宗之天下上天之所付託生民之所仰賴昔太祖高皇帝櫛風沐雨十餘年而後得早作夜思三十餘年而後定何其勞也太祖文皇帝南征北伐定鼎貽謀亦二十餘年而後成何其難也列聖相承兢兢業業罔有怠荒以致今日先帝顧命惟欲陛下早

嗣大位早成大婚光前裕後衍無疆之祚聖慮所及亦  
何其深且遠也四五年間陛下春秋鼎盛而儲嗣未聞  
中外臣民傾耳拭目以俟前星之耀此臣等所以憂懼  
也伏望陛下念上天付託之隆思祖宗授受之重體生  
民仰賴之切每于朝奏講讀之暇安處宮闈溥施恩澤  
起居以節游豫以時保養天和培植國本則六氣不能  
侵百邪莫敢近皇儲早立寶祚延長可以隆我國家萬  
年之業矣未報

諫調邊軍入衛

李東陽

有獻密計者託言京軍不習戰陣欲調宣府邊軍三千入衛京師而以京軍充數戍邊每歲春秋番換如班操例上遣司禮監谷大用同至閣議公力辨以為不可大用等謂此事非我輩所為自有先入之言牢不可破盍姑試之以俟再議公曰某等職在論思預聞國計知其不可若勉強曲從即有後患獻計者不知何在而執筆者固存國事一壞雖死何贖往返再日乃具揭帖畧陳

其故曰宣府京師北門切見強敵十分緊要朝廷屯宿鎮兵分地防守尚恐不給每年河南等處官軍輪班備禦近因劉賊猖獗動調官軍乃是一時權宜亦非得已況今正是防冬時月縱使京軍在彼徒為勞擾亦難濟事祖宗百餘年來未嘗有此恐傳聞四遠未免驚疑臣等不敢輕議如謂聖駕看牲在邇欲比常加意竊見總兵卻永見在滄州宜令兵部密地行文暫帶領邊軍近京住劄事畢之日仍令還鎮庶事體穩當人心安靖乃

下兵部會議兵部始以為可行及聞閣議及衆論多未  
協者覆議至再皆云不可而內意已定司禮監文書迫  
令擬票去上坐乾清宮門必欲今夜批出公等乃具題  
本極言其不便曰京邊官軍各有分地必有急事乃可  
互相應援今無事而動一不便也京軍備邊不習戰陣  
難保必勝恐損國威二不便也京軍出京駭人耳目傳  
聞各處未免驚疑三不便也京軍出外倚恃強勢占住  
房屋索要錢物需索酒食強買貨物奸污婦女將官護

短而不肯禁邊方受害而不敢言四不便也邊軍在內  
狎恩恃愛傲睨軍民蔑視官府小則怠玩大則違法治  
之則或不能堪縱之則愈不可制五不便也違遠鄉井  
拋棄骨肉或風氣寒暖之不相宜或盤費供給之不相  
續六不便也糧草之外必用行糧布花之外必須賞賚  
非緊急不得已之時為糜費無紀極之計七不便也往  
來交替無有寧息倉卒之際或變起於道途厭倦之餘  
或患生於肘腋八不便也示京營之空虛見中國之單

弱九不便也西北諸邊見報聲息唇齒之地正須策應  
脫有疎失咎將誰歸十不便也凡此一事不便者有此  
數端今五府以為不便六部等處衙門以為不便六科  
十三道皆以為不便臣等以腹心之臣居輔導之地若  
阿諛委順強勉曲從是滿朝之臣皆有為國之心而臣  
等獨當誤國之罪萬死不能以塞責矣伏望聖明洞察  
博採人言稍俟從容務求至當實宗社無疆之福也所  
有前項事情臣等不敢別議



嘉靖登極詔草

楊廷和

奉天承運皇帝詔曰朕承皇天之眷命賴列聖之洪休  
奉慈壽皇太后之懿旨皇兄大行皇帝之遺詔屬以倫  
序入奉宗祧内外文武羣臣及耆老軍民合辭勸進至  
于再三辭拒弗獲謹于四月二十二日祇告天地宗廟  
社稷即皇帝位深思付託之重實切兢業之懷惟我皇  
兄大行皇帝運撫盈成業承熙洽勵精雖切化理未孚  
中遭權奸曲為蒙蔽潛弄政柄大播凶威朕昔在藩邸

之時已知非皇兄之意茲欲興道致治必當革故鼎新  
事皆率由乎舊章亦以敬承夫先志自惟涼德方在冲  
年尚賴親賢共圖新治其以明年為嘉靖元年大赦天  
下與民更始所有合行事宜條列于後

一自正德十六年四月二十二日昧爽以前官吏軍民  
人等有犯除謀反逆叛子孫謀殺祖父母父母妻妾  
殺夫奴婢殺家長殺一家非死罪三人採生折割謀  
殺蠱毒魘魅毒藥殺人強盜妖言奸黨失機并事干

邊方夷情及人命至死罪者不赦外其餘已發覺未發覺已結正未結正罪無大小咸赦除之有以赦前事相告言者以其罪罪之

一弘治十八年五月十八日以後正德十六年四月二十二日以前在京在外內外大小官員人等有因忠直諫諍及守正被害去任降調遷改充軍為民等項及言事忤旨自陳致仕養病等項各該衙門備查明白開具事情奏請定奪死忠者諭祭修墳廕叙降調

遷改致仕養病閒住充軍為民者起復原職酌量陞用大臣量進階級并與應得恩蔭人夫月米相應起用者有缺推用已故者加贈

一正德十四年文武官員人等為因諫止巡游跪門責打降級改除為民充軍等項該部具奏起取復職酌量陞用被打死者情尤可憫各追贈諭祭仍蔭其子入監讀書內有充軍故絕者一體追贈諭祭查訪親屬量與優養

一王府冊封朝廷大禮今後該部務照舊制一年一次舉行

一各處王府應得祿米有缺少者各該巡撫都御史督率所屬查催完納

一各處郡王將軍府子女有應請名請封選婚者本府即與保勘奏請承奉長史等官不許刁蹬其有年已長成未曾婚配貧難無力者所在官司量為助給  
一各處郡王將軍中尉有因事革減祿米者除毆殺人

命敗倫傷化外其餘自詔書到日為始俱照舊支給  
儀賓有因成婚年遠不曾赴京謝恩叅奏者悉皆宥  
免

一自正德元年以來諸色人等傳陞乞陞大小官職盡  
行裁革吏禮兵工四部各將查革過傳陞乞陞文武  
僧道匠藝官員名數類奏查考其皇親及公主所生  
子孫原無出身正途朝廷推恩陞授者不在此例

一兩京五府見任掌印僉書管軍管事公侯伯都督及

都指揮六部等衙門見任文職四品以上官并各處  
巡撫官俱聽自陳去留取自上裁武職內有傳旨管  
事者革去管事照舊帶俸文職五品以下兩京吏部  
照例會官考察

一內府各衙門見任官員有侍從年久供事勤勞願告  
優閒者許各具本陳請取旨定奪

一給事中御史職當言路今後凡朝廷政事得失天下  
軍民利病許直言無隱文武官員有貪暴奸邪者務

要指陳實跡糾劾在外從巡按御史糾劾

一官吏軍民人等犯罪自正德九年正月二十八日以後已問結立功哨嘹運灰運炭運磚運石做工納米納料納鈔擺站煎鹽炒鐵充儀從軍伴膳夫及罰班重厯拘役枷號等項悉皆放免中間若係行止有虧敗倫傷化例該帶俸差操革職為民者仍各照例發落

一武職官降級調衛者除失機事干邊情不宥外其餘



俱復職回衛內原係錦衣衛調在京別衛文職因公  
錯并公事誑誤降級者復原職內原係京官者對品  
別用其因事革罷為民者除事干行止有虧敗倫傷  
化外悉與冠帶閒住原係冠帶閒住及京官調外任  
致仕者各照原職致仕

一各處武職有因私役軍人不及五名例前問擬降級  
者守邊失誤被賊搶擄人民不及五名情輕律重降  
級者俱復還原職其各邊軍人因失事饒免發遣常

川守哨者亦免守哨

一正德十五年十二月以前各處實徵稅糧馬草農桑  
人丁絲絹布疋絲綿花絨屯田皇莊莊田子粒牧馬  
草場子粒租銀及甲丁二庫蠟茶銅漆銀硃鹽課厨  
料戶口食鹽猪羊雞鵝備用孳生馬騾山厰柴夫後  
府柴炭軍器沿河軍衛有司蘆葦茭草夫價及閘埧  
泉溜洪淺等夫并椿草等料及曠役等項銀兩一應  
歲派歲辦奏派但係該納官錢糧物件拖欠未徵者

盡數蠲免以甦民困已徵在官該起解者照舊起解  
准作本戶以後年分該納之數各造冊奏繳查考敢  
有將已徵捏作未徵侵欺盜用者許諸人首告巡撫  
巡按及守巡司官察訪拿問重治造冊官吏叅奏提  
問戶工二部差去催徵官員即日回京

一浙江等十三布政司并南北直隸嘉靖元年分內除  
漕運糧斛四百萬石照舊徵兌起運其餘夏秋稅糧  
馬草農桑人丁絲絹布疋絲綿花絨屯田皇莊莊田

子粒牧馬草場子粒租銀及甲丁二庫蠟茶銅漆銀  
硃等料不分存留起運以十分為率俱免五分以甦  
民困

一京通二倉水次倉皇城各門京城九門各馬房倉場  
各皇莊等處但係正德年間額外多添內臣司禮監  
照弘治初年例查奏取回

一近年差出取佛買辦織造燒造等項及腹裏地方并  
各邊各關但係正德年間新添分守守備內臣詔書

到日即便回京其各處分守守備內臣將官有正德  
元年以後黃緣改作鎮守分守及副總兵等項名色  
并分外多管地方加添責任者兵部俱查奏改正換  
給勅書

一自正德年來兩京各衛所容令無籍之徒冒籍投充  
并新添旗軍校尉勇士力士軍匠并內府各監局招  
收軍匠等役辦納官錢私役占用不下八九萬餘歲  
支錢糧百萬餘石以致京儲虧耗歲用不繼關係非

輕論法都當拿問追究但既遇赦姑容改正詔書一出但係正德年間冒籍投充并新添及私自頂補額外招收等項人役并有名無人該衛所官按月支糧包辦月錢者即便各回原衛原籍隨住當差該衛所即將名伍開除回報戶部具數奏聞敢有捏奏存留設計影射仍前冒支官糧者事發都押發遼東鐵嶺衛永遠充軍該衛所官吏拿問調煙瘴地面安置一騰驤左等四衛勇士除弘治十八年兵部并科道官

查出見役正數并事故外其餘詭冒名籍未經裁革  
仍又黃緣回衛虛掛名額者各照原擬舍餘發原衛  
民丁發在京缺軍衛分各充軍役食糧差操以後勇  
士替補照例開送兵部驗軍官處驗過方許收糧

一權勢中鹽侵奪民利并客商中鹽增價轉賣俱問罪  
入官律有明禁近年以來奸商投託勢要每遇開中  
盡數包占轉賣取利甚至奏開殘鹽減價中支每米  
一石支鹽四引任場買補夾帶私鹽阻滯正課以致

鹽法大壞邊儲告乏罪雖宥免鹽當追沒詔書到日  
巡鹽御史并各運司官即便查訪鹽糧勘合內坐到  
已支未掣并未派未支鹽課但係商人投托勢要詭  
名占中賣窩買窩及河東運司鹽課例該宣府中納  
被勢要奏討賣窩別處開中并奏開殘鹽減價報中  
者悉照大明律裁革入官不許放掣派支敢有將勢  
要中鹽賣窩買窩情由設計隱瞞仍舊冒支官鹽掣  
賣者許諸人首告給賞正犯追完鹽課發邊遠充軍



干碍勢要聞處治巡鹽御史運司官吏知情容令掣  
支各治以罪其見堆皇鹽並各處已賣銀兩未賣鹽  
斤盡數入官各項入官鹽課巡鹽御史作急回奏戶  
部查照邊儲急缺去處開中本色糧料以濟急用

一在內御馬倉天師庵中府二草場在外埧上等十九  
馬房倉吳家駝裏外牛房司牧司司牧局今年合用  
糧料草束於原會數內減去一半坐派以甦山東河  
南北直隸小民困苦以後年分還著巡視科道官備

查馬匹牛羊實在數目照數會計以免冒濫

一近來抄沒犯人莊田園圃戶部委官從公查勘如有倚恃權勢侵奪霸占者審証明白歸還本主管業若係原有及兩平置買價直無虧者照依時價變賣銀兩送太倉銀庫交收備邊若地畝數多離京五十里之外者行令該管州縣召人佃種照例起科

一抄沒犯人玄明宮地土原係軍民住居墳墓該給主者該部會同科道官逐一查審明白給主管業

一近年各處鎮守協守分守守備等官違例奏帶人衆  
到于地方科歛財物奪占功次所在不才官員因而  
乘機指一科十貪利成風以致百姓受害深可痛心  
詔書到日例外奏帶人員即便各回原衛原籍閒住  
當差違者許撫按并按察司官察訪叅奏拿問官舍  
旗軍調邊衛差操民發口外為民書辦省祭等官革  
職不敘今後敢有仍前奏帶人多及帶軍民職官錦  
衣衛旗校者該科即時劾奏究治其鎮守等官中貪

刻顯著壞事有名者各該巡按御史指實具奏取回  
司禮監從公推舉平素廉靜老成之人奏請更替仍  
照舊例寫勅不許干預錢糧詞訟侵越諸衙門職掌  
亦不許假以進貢為名僉取皂隸科歛銀兩擾害軍  
民額外進貢一切停止

漕運官軍僨運糧儲經年累歲不得休息貧苦可憫  
正德十四年以前京通二倉若有掛欠糧米席皮板  
木腳價一切赦免其南京并臨德徐淮水次拖欠者

不在此例

一漕運官軍借欠債負利上生利為害百端自正德十五年以前借者不拘多寡俱不許還以蘇漕運官軍困苦以後再借再放者聽漕運都御史巡按巡倉御史查例叅奏重治

一各處徵糧養馬地土内有水衝沙壓坍江等項負累人戶包養累經具奏者巡撫巡按官查勘明白具奏除豁

一各解納錢糧到京內外管收人員刁蹬需索使用之數多於本物以致上納不敷重複徵解貽累小民該部申明禁約許被害之人指實奏告治以重罪

一南北直隸山東山西陝西湖廣浙江江西等處地方大軍經過及雖無軍兵經過但奉有明文取辦供應軍需等項所司動支官錢糧應付者各該撫按官查勘明白准作正支銷不許復行徵補重困小民

一內府多餘宮人著司禮監逐一查審有親屬者各令

的親家屬領回任其婚嫁無親屬者官與婚嫁務令得所

一在京抄没犯人錢寧等并江西逆賊宸濠等入官財物除金銀并器皿首飾珍寶及違禁之物外其餘紗羅紵絲綾紬布絹鋪蓋衣服靴帽家火器玩等件若貯庫年久不無浥爛損壞可惜著戶部科道各差官二員查盤見數估計鈔貫明白補放文武衙門官員正德二十四十五年各上半年折俸之數若有多

餘換年再補

一各處無籍奸人游食術士及無名內使私自淨身人等多有投託王府因而撥置害人甚則貽累宗室詔書到日許令自新各還本務各該撫按官仍要嚴加禁治不許故縱容留以稱朝廷親親至意

一文武官員有因事住俸罰俸回話者悉皆宥免

一南京內府各監局軍匠有丁盡戶絕名伍不除冒支月糧者南京戶兵工三部盡行查革



一近年以來內府各監局官員內使添增太多供用浩繁其非祖宗舊制司禮監逐一查選照依弘治以前員數存留供事多餘之數俱以本等職事聽用如遇各王府及內京各監局缺人奏請撥去應用其原係海戶貢緣驟入者仍舊查充海戶見充海戶者禮部盡數發回原籍為民當差不許在京潛住其原係樂工淨身收內府者亦盡數革退發南京孝陵衛充軍一私自淨身之人多有在京潛住希圖收用着錦衣衛

緝事衙門巡城御史嚴加訪拿問今後各處軍民敢有私自淨身者本身并下手之人處斬全家發煙瘴地面充軍兩鄰及歇家不舉首者俱治以罪

一宸濠之變都御史孫璉按察司副使許達仗節死義并一時被害不屈之人日久尚未褒錄都御史王守仁倡義督兵平定禍亂并同事協謀有勞之人亦未及論功行賞該部即便會官擬議奏來定奪

一問刑衙門有抄提在官人口犯該反叛應連坐未給

配安置者奏聞定奪其有律不該載者悉皆放免原沒官田產給還住種照舊納糧當差

一正德元年以後在京在外官旗軍舍人等但係例外奏帶及稱報効在各邊各處或一人數處或一時兩三處報功及併功陞官旗者除原祖職役照舊其餘盡行除革各衛所各將革過名數送戶兵二部查考敢有受財隱避不革及抗違妄奏者俱問發邊衛充軍其諸色人等冒認錦衣衛官員戶下舍丁致陞官

旗者限三箇月以裏許各官旗自首與免本罪冒籍之人革去職役過限不首該部查出或被入告發通行治罪發遣

一正德十二年十月內大同應州功次極為冒濫內有傳陞文職者吏部查奏軍職除本邊官軍自斬首級例該陞級外其餘陞者不分已未領受兵部查奏裁革

一近年軍職人等在各邊不曾斬有首級巧立當先衝

鋒等項名色及各處斬首不及數該部照例擬賞奉  
旨陞級世襲者兵部通行查革

一武職并舍人舍餘旗校納銀等項授職并冠帶者獲  
功止許於實授職役上加陞

一賜姓人員及見犯罪冒姓者各復本姓在京者各照  
原有本等職役閒住隨住當差在外取到留用者不  
分官職大小各回原衛原籍帶俸閒住但因賜姓義  
子廕陞職爵并與做勇士等項食糧名色者兵部盡

行查革原係在外官員罷閒并原跟犯罪勢要無名籍惡黨俱不許在京潛住違者錦衣衛巡城御史五城兵馬司挨拿遞解窩家送問

一在京武職除近選軍政并會保將材外其餘有告願改調外衛者該部查勘相應具奏改調仍聽撫按官照例考選管事

一軍職病故子孫告襲扣算年月但在十年以裏該衛查勘明白保送到部者即與收選免其駁查

一錦衣衛校尉專係直駕人役近年多有奏討投託濫  
占跟用因而令其幹辦私事脅制害人該衛盡行查  
明取回

一南京年例進解馬快舡隻舊例每起不過三隻正德  
九年以來違例撥給比舊加多攬載客貨沿途攪擾  
本等廩給夫役之外勒要銀兩數多甚為民害兵部  
出榜通行禁約今後進解舡隻務照舊例撥給經過  
地方不許分外生事勒要折乾銀兩違者巡按巡河

等官指實參奏不許故縱

一順天保定河間三府各州縣自正德三年以來寄養馬疋俱各年齒衰老節次兌軍揀退不堪負累民餽養兵部行文太僕寺分管官督同該府州縣管馬官勘實果係老馬變賣價銀轉解太僕寺貯庫贖補買馬支用

一法司錦衣衛見監罪囚中間或鍛煉成獄或拘泥文案多有枉抑今後問刑務要法當其情不許深刻所



問犯人及在外問成解來人犯伸訴冤枉或調別衙門多官會審務要從公推問實情果有冤枉即與辦理不許拘執成案逼勒招認符合前問官吏致令枉抑無伸違者罪之

一凡問囚犯今後一依大明律科斷不許深文妄引參語濫及無辜其有奉旨推問者必須經由大理寺審錄毋得徑自叅奏致有枉人近年條例增添太繁除弘治十三年三月初二日以前曾經多官奉詔會議

奏准通行條例照舊遵行外以後新增者悉皆革去  
一江西并各處地方先因宸濠反逆事敗及因人告報  
謀反妖言等項事情一時追捕餘黨急於撲滅不暇  
審辦未免有迹涉疑似被誣逮繫者經該問刑衙門  
務要嚴加詳審果係誣枉即與釋放若係逼脇順從  
者問擬明白奏請定奪毋得冤抑淹禁

一內外各衙門見監死罪重囚犯在赦前罪不該宥內  
有情可矜疑曾經奏請未得饒死及毆傷人延至保辜

限外身死照例仍擬死罪者詔書到日覆審是實俱免死發邊衛永遠充軍若有辨問罪不至死者即行查照發落

一見監與宸濠謀反事情有干正德十四年就陣擒獲及續拿人犯三法司錦衣衛先行會問明白其真正共謀逆賊并臨時協從及先年交通不曾與謀者各依律議擬應得罪名再會多官覆審相同具奏定奪毋致輕縱冤枉

一各處盜賊多因饑寒困苦流離失業脇從逼迫嘯聚  
為非詔書到日各該官司通行出榜曉諭許其自首  
免罪軍還原伍民還原籍各存恤一年免其差徭其  
有能擒捕首惡黨類報官者照例陞賞仍量給犯人  
財產

一官吏軍民人等自正德九年正月二十八日以後至  
正德十六年四月二十二日以前有為事問發充軍  
遷發為民者除原係真犯死罪饒死及事干謀反逆

叛奸黨失機強盜撥置侵盜係官錢糧指稱打點誑騙者不赦外其餘悉皆放回原衛原籍寧家隨住若有赦前逃回不首原係真犯死罪饒死充軍例該照依原擬處決并雜犯死罪以下充軍例該枷號改發極邊衛分者免其處決枷號仍各發原充衛所著役其遷發為民者免其問罪仍發原編配所

一內外各衙門罪犯該追贓物係還官給主銀貨至五十兩以上并入官至一百兩以上監追一年之外及

正犯身死拘禁家屬各勘無家產堪以變賣賠納者  
開具所犯情罪奏請定奪其不及前數監追半年之  
外及正犯身死各勘無家產并例該追罰馬牛等項  
悉與宥免查照發落若係埋葬銀正犯見在者仍依  
律追給

一內外衙門有問完官吏軍民人等罪犯已經奏請未  
曾奉旨發落應該宥免者即行查照發落其有監候  
行勘未報人犯罪該宥免者并正犯在逃監禁家屬

証佐不係事干謀犯逆叛劇賊者悉令保候歸結  
一近年節次奏開生員納銀入監事例積累數千餘人  
大壞選法今後再不許奏開違者吏部該科即時糾  
劾究治已開未納者即便停止至於額設吏役亦須  
得人近年納銀收充阻塞正途之人致令歇役革退  
雖有考選事例繁復不一吏部便查會典開載選撥  
吏役舊例申明遵守行令各布政司直隸府州凡遇  
缺吏從公考選徑自收叅納銀人役務令習學字書

通曉文移方許收叅若願告改撥衛所事簡衙門者  
聽俱開報巡按御史查照訪察內有選撥不公或被  
人告發或按問得實依律究治

一各書辦人員除大營額設員數外其餘黃緣額外添  
設者并各夷地方遠年不用小通事冒濫保補者通  
行查革

一工部供應內府各監局內官內使人等年例柴薪靴  
料皮張冬衣鋪陳紵絲綾紬紗羅等項近年以來增



添數倍該部往往借貸別項官錢輾用動經數萬累及官民終非經久之計著司禮監會同該部查照永樂至天順年間人員數目關給則例通融處置除見有本色物件外不敷之數將近年抄沒犯人贓物銀兩兩平估折相無俵散准作正德十五十六年年例之數少寬民力

一兩京各監局等衙門近年額外增添器物如龍舡戰車神象店房等項數多管事人員乘機作弊將物料

工作任情冒派侵尅害民今後除舊額器物房屋應修理成造者俱照會典所載舊定數目從實會計除本衙門并各庫會有外會無者量為從省派辦不許隱匿冒濫改舊漆新并招買那借貽害小民違者治罪

一內府禁密之地不許蓋造離宮別殿載在祖訓萬世當遵近年以來節被左右近幸之人獻諂希恩在內漆蓋新宅佛寺神廟總督府神武營香房酒店之類

在外添蓋鎮國府總督府老兒院玄明宮教坊司新宅石經山祠廟店房等項便著內官監工部錦衣衛科道官逐一查勘但不係舊規者或折毀改正或存留別用或變賣還官官匠人等有因蓋造陞官者亦就查革改正在外聽撫按官一體查勘改正變賣還官不許隱匿

一近年南京駕到各樣舡隻數多俱在通州張家灣停泊勞人看守日久損壞無用著內官監工部便去會

看除年例黃舡照舊存留聽候外其餘烏龍舡發送  
南京兵部改作擺江舡黃舡發送南京工部照舊看  
守聽差黑樓等舡發送杭州府等處聽候進鮮進龍  
衣等項公用免派民間修造其餘魚舡等項變賣價  
銀收貯監部以備修造正支

一荊州杭州蕪湖三處抽分廠專為打造糧舡成造供  
應器皿而設以省科派小民之計近來兩京各監局  
相沿且奏差人赴蕪湖廠支取杉楠等木數多又有

內官監差官中半抽分二年有餘致將造舡銀料不敷支給累及運軍出利揭債缺舡運糧耽誤國計今後南京各監局合用竹木聽於本處龍江瓦屑等抽分廠支取在京各監局合用竹木聽於內官監神木廠并真定盧溝橋抽分廠支取其內官監原差抽分太監李文等詔書到日即便回京以後不許援例奏差

一天下司府州縣抽分稅課衙門俱有定額近年以來

凡橋梁道路關津有利處所私自添設無名抽取數  
多甚為民害詔書到日巡按御史及按察司分巡官  
通行查革有司嚴加禁約不許坐視故縱

一河防水利小民衣食之源關係最重各有專官管理  
該管官員務要躬親巡歷嚴督所屬修築圩岸疏濬  
溝渠但有權豪刁潑之家修建池亭設立碾磨阻壞  
水利坑陷錢糧者并聽自首拆毀改正與免本罪若  
有抗拒官府執迷不首者許隣佑之人告舉究治所

在官司容情故縱者事發一體治罪

一易州山廠柴炭今後悉遵先年舊額派納惜薪司近年新添加耗之數俱改正照舊其有攬頭指稱打點多勒價銀許被害之人首告管廠侍郎痛加改革不許仍踵前弊如違治以重罪

一自正德年來劉瑾錢寧江彬相繼擅權在京在外各該衙門弊政多端詔書該載不盡者許逐一自行議奏裁革

一近來冒濫玉帶蟒龍斗牛飛魚服色數多除五府九卿堂上官外其餘庶官雜流并各處將領頭目諸色人等但係寅緣奏乞傳賜者俱不許穿用內府各監局官員司禮監查奏裁革武職卑官僭用公侯服色花樣者一體禁約

一浣衣局近年抄沒婦女法司逐一弔查原卷詳究事由情可矜宥者具奏釋放

一錦衣衛旗校人等除弘治年間編軍冊內見在數目



外其餘詭名頂補僉補在逃故絕等項人役冒濫食糧者戶兵二部各選差屬官會同科道及本衛公正官查議裁革

一豹房各處積年收貯并近日抄沒犯人銀兩司禮監查記明白數內運數百萬兩於太倉銀庫收貯以備折放官軍俸糧等項支用

一正德元年以後各衙門官軍旗校人等緝捕妖言奸細並不係臨陣對敵強賊一應陞授職役者通行查

革以後各衙門照舊年終類奏兵部查議陞賞

一正德年以來傳陞乞陞法王佛子國師禪師等項禮部盡行查革各牢固枷釘押發兩廣煙瘴地面衛分充軍遇赦不宥近日奏討葬祭一切停革其中有出入內府住坐新寺誘引蠱惑罪惡顯著見在京者禮部通查明白錦衣衛還竿送法司問擬罪名奏請定奪

一先在軍門辦事指揮張璽張倫及掌案寫字等項人

員宮勲趙真殷大安王鎬王鎮陳貴龐璽晁用鄭曦  
賈銘高湜朱鳳翔管皇店千戶趙謹姚俊俱倚勢生  
事蠹政害民內外軍民怨入骨髓本都當處死姑從  
寬各連當房家小押發兩廣煙瘴衛分永遠充軍其  
餘跟隨辦事管店助惡有名小班答應旗校人等錦  
衣衛還拏送法司究問中間罪惡顯著者一體押發  
兩廣煙瘴衛分永遠充軍家小隨住俱遇赦不宥  
一回夷舍音和珊交通土魯番興兵構亂攪擾地方以

致哈密累世受害罪惡深重曾經科道鎮巡官勘問明白既而夤緣脫免錦衣衛還拏送法司查照原擬開奏定奪

一回回人于永出入豹房誘引蠱惑情罪重深錦衣衛拏送都察院追問明白議擬罪名奏請處治

一今後照依舊例給事中有缺於進士內考選奏補御史有缺進士與行取人員相兼考選除授

一朝廷政事得失天下軍民利病許諸人直言無隱

一已上興革政令詔書到日有司即便奉行如有延緩者許巡按御史按察司訪察究問俱以違制論

嗚呼君人之道在昭德以塞違繼世之規惟更化而善治特頒渙號用慰輿情宏施大賚之恩永錫太平之福四方臣庶咸使聞知

乞停差官織造疏

楊廷和

懇乞憫念災傷窮民乞賜停止差官織造事內開近該臣等奏乞免撰差官織造勅書節奉聖旨官已差了再

不必具擾執拗欽此臣等一聞此旨相顧驚愕備員大臣素蒙禮貌不意聖明一旦有此在朝羣臣亦皆彼此駭嘆謂雖正德年間亦未見批荅內閣題奏有如此旨意者臣等固當引身求避以明不可則止之義但展轉以思不能無庶幾改之之望若以具擾執拗為嫌而乃悻悻然見于其面非臣之所宜自處也臣等豈敢以此擾陛下哉恐災傷窮民不堪織造之擾千百成羣起而為盜以覆天下也亦非敢固執已見違拗不通也執關

前旨雖出御筆親批決非司禮監官所敢議擬不知撰  
寫進呈果出左右何人之手我祖宗朝一應批答皆由  
內閣擬進惟正德年間權奸亂政有擅自改擬營求御  
批以濟其貪私者新政以來不曾明正其罪遂令此輩  
邪佞小人敢於今日復蹈前車覆轍其心惟欲蒙蔽壘  
惑以圖身家富貴不顧生靈休戚社稷安危陛下何忍  
墮其奸計壞祖宗之法度哉祖宗天下至正德間幾致  
傾覆仰賴陛下再造乾坤轉危為安中外軍民始獲稍

甦然國勢民力比之成化弘治等年百尚不及一二今日豈堪敗壞邪興言及此可為流涕臣決不敢撰寫勅書以重誤國殃民之罪伏望陛下俯垂監察停止織造官員不差仍乞命司禮監官將前項蒙蔽蠱惑邪佞小人逐一查出斥逐在外不許仍前侍奉左右以杜後來亂政壞事之漸實宗社萬萬年無疆之慶奉聖旨卿等所言具見忠誠愛君恤民至意朕心已知宜安心辦事但官已差了寫勅書與他着安靜行事毋許分外擾人



該衙門知道

名臣經濟錄卷十四

欽定四庫全書

名臣經濟錄卷十五

明 黃訓 編

內閣

論簡侍從之臣一 丘濬

臣按八柄詔于冢宰內史復掌以詔王蓋史官公論之所在爵祿廢置殺生予奪之柄有所不公史氏直筆以書之吳澂謂內史為翰林之職蓋以其命諸侯公卿大

夫則策命之猶今學士院之草制詔也然謂之史乃掌  
文書贊治之名今制併史館於翰林其亦此意歟我太  
祖皇帝於吳元年已置翰林院以陶安為翰林學士於  
是設承旨學士侍講侍讀學士直學士及待制應奉等  
官洪武九年詔定百官品級承旨與六部尚書俱正三  
品學士從三品侍講學士從四品十八年三月始定翰  
林官制而革承旨直學士待制應奉之名設學士二員  
秩五品講讀學士各一員從五品其屬則有侍講侍讀

五經博士典籍侍書待詔外此又設修撰編修檢討以  
為史官皆屬之翰林院焉夫學士代言之官講讀經筵  
之職五經博士典籍則前代秘書之屬侍書待詔則前  
代供奉之名而所謂史官者則前代著作起居之任也  
今則併屬於翰林則是今代翰林一司實兼前代諸職  
其職任尤非他官比也永樂初太宗皇帝又東七人者  
入內閣專知制誥備顧問參預機務然其秩猶止五品  
也至仁宗皇帝又于本官上加以卿佐師保其任用尤

為重焉歷任既久又易本官以文淵閣大學士華蓋殿  
謹身殿武英殿大學士云

論簡侍從之臣二

丘濬

臣按編修檢討專以修史始見於此前此固有所謂編  
修官者蓋專以修經武要畧為職屬之樞密院名雖同  
而實則異也然編修檢討在前代者皆名以官我朝止  
稱編修檢討云臣嘗因是而通論古今之史官矣夫天  
下不可一日而無史亦不可一日無史官也百官所任

者一時之事史官所任者萬世之事周禮宰夫八職有  
史以贊治漢法太史公位丞相上天下計書先上太史  
公副上丞相唐及宋宰相皆兼史官其重有如此者自  
成周有左右史漢有起居注唐宋起居舍人著作郎之  
屬皆所謂史官也我朝開國之初猶設起居注其後革  
之而惟以修撰編修檢討當國史焉遇有纂修則以大  
臣為之監修學士為之總裁其法制可謂簡而要矣然  
是職也是非之權衡公議之所繫也禹不能褒繇管蔡

不能貶周公趙盾不能改董狐之書崔氏不能奪南史之簡公是公非紀善惡以志監戒自非得人如劉知幾所謂兼才學識三者之長曾鞏所謂明足以周萬事之理道足以識天下之用智足以知難知之意文足以發難顯之情不足以稱是任也雖然此猶非其本也若推其本必得人如元揭傒斯所謂有問學文章知史書而心術正者然後用之則文質相稱本末兼該而足以為一代之良史矣



論簡侍從之臣三

丘濬

臣按前代藏書之府非止一處而掌書之官非止一職名數雖異而職務畧同今代圖籍皆藏內閣所設之官止一典籍焉蓋本朝翰林之官雖有異名實無異職其所儲書非獨以存前代之舊蓋將以資儒臣之考閱講究以開發其聰明以為異時大用之具也仰惟太祖開基既設翰林院置學士等官又慮人才非儲養作興不能有成乃洪武癸丑命編修張唯等十人入禁中文華

堂肄業詔宋濂為之師上聽政之暇輒幸堂中取其文親評優劣命光祿給酒饌每食皇太子親王迭為之主給冬夏衣時賜白金鞍馬太宗永樂甲申命學士解縉選新進士中材質英敏者得修撰曾棨編修周述周孟簡庶吉士楊相王英王直等二十八人又增周忱為二十九人俾就文淵閣進其學且諭之曰文淵閣古今載籍所萃爾各食其祿日就閣下恣爾玩索務實得於已庶國家皆得爾用命司禮監給筆札光祿寺給飲食分

鈔以市膏燭賜第以為居止列聖相承按為故事每遇  
開科間于進士中選其俊異者如甲申制讀書中秘以  
儲養之前後得人比諸他年進士為多用之當時有得  
賢之效書之史冊為儒者之榮是誠一代之盛舉也臣  
伏讀文皇帝諭榮等有曰人須立志立志則功就未有  
無志而建功成事者汝等皆今之英俊當立志遠大不  
可安于小成為學必造道德之微必具體用之全為文  
必驅班馬韓歐之間古之文學之士豈皆天成亦積功

所致也一時諸賢服膺聖訓莫不奮發立志勉進學業  
皆大有所成就留者擅文學之名出者播政事之譽大  
哉皇言其所以主張文教作興人才為世道慮也一何  
遠哉三代以下所僅見也嗟夫賢才不易得亦不易知  
必隨時而取之不限一時必多方以試之不拘一藝然  
後賢才畢用而無遺苟惟取之於此時而他時則否試  
之以一藝而他藝則否而欲所用皆得其人難矣臣請  
著為定制一次開科一次選用簡擇之餘乃分諸司觀

政待新進士詣太學行釋菜禮畢即勅禮部諭俾各錄

平日所作文字投獻

所作如詩賦序記略頌  
書論擬古評史之類

封送翰林

考訂其中有辭未文理其學可進者別出題試之其所  
試之文與所投之卷相稱即取以預選不問年之長幼  
質之強弱苟有器識才思者即如故事命官教育以俟  
其成若其辭鉤棘而意詭異者不在所取三年之後隨  
其才器而任使之每科不必多選不過二十人每選不  
必多留所留不過三五輩如此則國家儲材以待用者

無非通經學古明體適用之儒布諸庶位列於內外者  
又皆得夫文學博雅之士以錯雜于政事法理之間以  
潤飾之臣見天下彬彬然多文雅之士儒皆真儒吏非  
俗吏凡其製作以華國施為以輔世者咸有可稱述者  
矣為治要務用人要術莫先於此

論東宮官

王鏊

人君之學與不學係天下之治亂太子之學與不學係  
後日之治亂其重可知也賈誼曰天下之命懸於太子

太子之善在于早諭教慎選左右今夫庶民之家有子  
焉則必擇保姆以保護之擇良師傅以教道之而況神  
器所屬係宗社之安危生民之休戚者乎昔者成王幼  
在襁褓召公為太保周公為太傅太公為太師所以保  
其身體傳之德義道之教訓此三公之職也又置三少  
曰少保少傅少師與太子宴游者也又選天下端正孝  
弟博聞有道術者以翼衛之所與居處出入者也逐去  
邪人不使見惡行故太子生而見正事聞正言行正道

前後左右皆正人也其身有不正者乎古之教太子者其制如此今國家東宮之官師保而下有庶子諭德洗馬校書等官亦既備矣然官以序進未必皆天下之選學之日晨而授書授畢而退日中進講講畢而退況祁寒暑雨學皆間歇間歇之日所與宴游者誰歟所與居處出入者誰歟不可得而知也又近世之弊患在上下不交然為太子亦且未同於君今也則已儼然端默有言且不敢進又況為君之日乎求上下交而德業成胡



可得也昔者三王之教世子必齒於學國人觀之曰將  
君我而與我齒讓何也曰有父在則禮然而衆知父  
子之道矣其二曰將君我而與我齒讓何也曰有君在  
則禮然而衆知君臣之義矣其三曰將君我而與我  
齒讓何也曰長長也然而衆知長幼之節矣此所以學  
為父子君臣長幼之道而與人同如此下至漢唐此意  
泯矣然明帝授書於桓榮及為天子矣執轡而饋執爵  
而酌唐劉洎岑文本馬周遜日往東宮談論治道李泌

與肅宗為布衣交出則聯轡寢則對榻國朝洪武初建  
大本堂取古今圖書充其中延四方名儒教太子親王  
分番夜直才俊之士充伴讀時時賜宴賦詩商確古今  
評論文學無虛日仁宗于潛邸臣嘗伏覩其教令長至  
燕勞東宮之臣如家人父子又從學詩學為表則本朝  
之初亦未嘗如今制也英宗幼冲當時大臣無深識遠  
慮阿時所好務為尊君卑臣非祖宗之法本然也今雖  
未能如古之制亦宜稍畧君臣之儀敦師友之分使宮

僚日侍左右從容講讀講讀之暇宴飲出入居處皆得周旋其間至暮乃退或有剪桐折柳隨事諫止游戲翰墨端其所嗜宮僚有不法從三師糾正之甚者斥逐不使邪人得預其間如此所謂一人元良萬邦以貞三代所以久長者用此道也漢宣帝時欲使外家許氏監護太子家疏廣以為太子師友必于天下英俊不宜獨親外家太子官屬已備復使舜監護視陋非所以廣太子德于天下也貞觀中撰太子接三師之儀出殿門迎太

子先拜三師答拜每門讓三師坐與三師書前名惶恐  
後名惶恐再拜宋天禧二年庶子張士遜等言臣等日  
詣資善堂叅見皇太子雖令升階列坐然後跪受望令  
皇太子坐受叅見詔不許至道元年皇太子每見賓客  
必先拜迎送常降階及門乾道七年討論東宮開講并  
慶賀辭謝禮儀宮僚講讀當依倣講筵稍殺其禮詹事  
以下至講讀官上堂并用賓禮叅見依官職序坐皇太  
子正席講讀官迭起如儀延英講罷復位節朔不受宮

僚叅賀元日冬至詹事以下箋賀謝辭初以常見之禮  
後離位致辭復位就坐茶湯罷詹事參見拜皇太子答  
拜庶子等初上叅見皇太子受拜庶子諭德乃講讀雖  
有坐受之禮止是五禮定三師朝賀東宮儀上以東宮  
師傅皆勲舊大臣當待以殊禮朝賀難同庶僚乃命考  
定其儀曰唐制羣臣朝賀東宮行四拜禮皇太子答後  
二拜三公朝賀前後俱答拜近代答拜之禮不行而三  
師之禮不可不重今擬凡大朝會前期設太子坐於大

本堂設答拜褥位于堂中三師賓客拜位于堂前至日  
太子常服升座三師賓客常服入就位北向立皇太子  
起立南向贊四拜太子受前二拜答後二拜乃退

震澤文集

論內閣

王鏊

予在翰林與陸廉伯語及楊文貞廉伯曰文貞功之首  
罪之魁也予問何為廉伯曰內閣故有絲綸簿文貞晚  
年以子稷故欲媚王振以絲綸簿付之故內閣之權盡  
移中官予亦不知其然否及予入內閣歷朝詔誥底本

皆在非所謂絲綸簿乎不聞送入況中官之專與否不在一簿之存亡也顧人主信用何如耳庶伯之言不知何所從授天下皆傳之嘉靖初年言路大開諫官紛然爭言利害有謂文貞居憂謀奪情起復遂以絲綸簿奉振不知文貞晚年歸省墓未嘗居憂也甚者又謂文淵閣印亦為司禮監所奪請追還之詔問印與絲綸簿今不知安在令言者自來追理還之言者伏罪乃已

# 論史官

王鏊

前代修史左史紀言右史紀動宮中有起居注如晉董狐齊南史皆以死守職司馬遷班固皆世史官故通知典故親見在廷君臣言定而書之後世讀之如親見當時之事我朝翰林皆史官立班雖近螭頭亦遠在殿下成化以來人君不復與臣下接朝事亦無可紀凡修史則取諸司前後奏牘分為吏戶禮兵刑工共六館事繁者為二館分派諸人以年月編次雜合成之副總裁刪削之內閣大臣總裁潤色其三品以上乃得立傳亦多



紀出身官階遷擢而已間有褒貶亦未必盡公後世將何所取信乎

論翰林

王鏊

宋時兩制皆文學名天下者始應其選雖一甲三人亦出知外任然後召試欲其知民事也其餘應試率皆一時赫然有名中外所謂制科是也故文學之士不至遺棄又通知民間利病以其曾試於外也國家翰林侍從亦兩制之類率用高科其餘則用庶吉士一甲三人終

不外任庶吉士每科或選或不選留者或多或少或國家之意本欲使之種學績文以為異日公卿之儲士既與此選自可坐致清要不復苦心於學又不通知民事天下以文學名者不復得預遺才頗多故不若制科之為得也制科行人人自奮於學以求知於上不待督責矣

論內閣官制

王瓊

朱子著中庸或問至敬大臣章有云使大臣而賢也則可如其不賢則所謂偏聽生奸獨任成亂禦下蔽上以

成其私而主不覺悟者亦安得而不慮也曰彼其所以至此正坐不知九經之義而然耳使其能明此義則必以正心修身為本而得其人以任之矣不幸而有趙高虞異李林甫之徒則亦亟求人以易之矣苟為不然吾恐君上之權不在大臣而移於左右其為國家之禍可勝言哉朱子此說是欲君聖臣賢兩得其人也然自古以來雖有賢君而為奸臣蒙蔽亂政亡國者多豈能君臣皆得其人哉惟我太祖垂訓立法高出千古罷丞相

任六卿無偏聽獨任之弊此法能世守之朝政悉付六卿如有違枉臺諫得糾正論劾朝廷端拱以照臨於上萬世無弊矣嘗見紀國初事蹟者內載洪武間設有殿閣大學士其職不過代草辭令然每有犯輒罪黜凡制誥碑文祭文多出御製如今天下各衙門表箋祝文祭文雖臣下所用亦出御製至于武臣誥命皆組織之不書其每日羣臣奏事面奏取旨畢各衙門將奉旨意批寫本後送該科類寫奉到旨意覆奏豈有大學士學士

敢自為口旨送內批于本面發出之事乎永樂始建內閣於東門內命解縉黃淮胡廣胡儼楊榮金幼孜楊士奇七人在閣辦事尋陞侍講仁宗皇帝正位東宮皆轉春坊官凡草制纂修等事惟翰林院掌之無內閣掌管之說也如永樂十三年纂修性理大全書成翰林院學士兼左春坊大學士奉政大夫胡廣奉政大夫右春坊右庶子兼翰林院侍講楊榮奉直大夫右春坊右諭德兼翰林院侍講金幼孜上表進呈蓋雖春坊官必須兼

翰林院職銜方得預纂修之事未有殿閣大學士而獨  
專纂修之事者也況永樂間胡廣所兼不過春坊大學  
士則是時殿閣大學士不設已久矣今雖尚書在內閣  
辦事六部請勅手本只云合用手本前去翰林院寫勅  
施行則舊意猶存可攷也終永樂之世二楊官止五品  
蓋為衙門所拘初未有衙門小官大之例也仁宗登極  
始以東宮舊臣陞士奇為禮部侍郎尋陞少保轉少傅  
兼華蓋殿大學士楊榮為太常卿進太子少傅兼謹身

殿大學士又陞工部尚書在閣辦事楊溥永樂間繫獄十年至是釋出擢翰林院學士尋陞太常卿兼學士內閣辦事此三人皆以龍飛超陞委任不可以例論也後楊溥丁憂起復不入閣宣德間因九年三品職滿方陞禮部尚書學士如故英宗即位復命入閣正統四年修宣廟實錄成進少保楊士奇楊榮俱進少師號三楊初楊榮陞尚書不過工部則不敢兼官壓六卿之意可見然自此官制一變其後遂使雜流出身在內閣書辦年

久者亦得陞至尚書至于序班道士亦以年資陞至尚書掌鴻臚寺太常寺事皆三楊開其端也由是內閣之權漸重無異宰相之設六部之權漸輕凡事多稟受內閣風旨而後行卒使祖宗官制額定之員得以增置而日久因襲遂不可復改矣

名臣經濟錄卷十五



欽定四庫全書

名臣經濟錄卷十六

明 黃訓 編

吏部 文選上

題減省官員事 商輅

臣叨侍近密輒以愚見數事開具進呈伏乞聖覽如有可行乞勅該衙門施行如中間事有難行者乞賜寢罷干冒天聰不勝戰慄之至謹具題以聞

一貴州湖廣先因猫寇猖獗蒙欽差保定伯梁珪右都御史王來并叅將等官統領官軍往彼征勦即今賊勢已息地方稍寧而總兵等官在彼久住軍馬衆多供給艱難况聞四川湖廣之民攢運糧餉不勝疲弊乞勅該部將梁珪等取回彼處止令都督方瑛陳友照依原奉事理調度二處官軍往來撫捕相機守戰其貴州方面并府州縣流官俱係額外添設之數俱乞取回庶得少甦民困地方幸甚

一臨清不過一縣地方先蒙欽差平江侯陳豫往彼鎮守築立城垣開設衛分操練軍馬即今已有次第切慮彼處巡按巡河管閘管糧收鈔收磚等項御史主事等官常不下七八員不無官多民擾乞勅該部將陳豫取回止令本衛指揮等官照例操守巡按御史經過提督實為便益臣又照得真定保定二府既有僉都御史祝暹在彼巡撫兼守備倒馬關其易州鎮守又有參贊軍務僉都御史陳泰近聞祝暹患病未

痊合無陳泰不妨參贊照鄒來學事例就令巡撫真  
定保定及提督紫荆倒馬關將祝遲取回定奪庶得  
責任歸一

一正統年間各布政司地方俱添設僉事一員專管屯  
田而南北直隸亦各設僉事於河南按察司帶俸令  
其提督順天并鳳陽等府屯種緣河南按察司與直  
隸有司無相統屬行事之際不無掣肘誤事今後南  
北直隸屯田合無照提調學校事例另設御史管理

惟復止令一處清軍御史帶管將見在僉事革去庶使便於行事

一山東等布政司并直隸保定等府正統十四年起取民壯不曾赴京見在本處地方操守者彼時勅旨丁寧諭以事平之日即放寧家今經三年未見定奪况前項民壯俱係丁多殷實頭等人戶大縣或五六百名小縣或不下二三百名除此之外有司每歲科派不無靠損下戶貧難小民愈致失所乞勅該部行移

各處將見操民壯悉發寧家一體當差其在京操守民壯并舍人餘丁人等亦乞勅該部計議酌量放免庶幾恩信兩全日後易於驅使

一薦舉本以求異才若國家科目未開則薦賢之路不可不廣方今科目大開豪傑之士皆由此進則薦舉之道豈容大濫臣切見各處保來儒士例皆除授教職中間多有學問膚淺禮貌粗疎不由學校罔知大體此等之人一槩使之為人師範豈不有誤後學乞

勅該部將見保來儒士發回原籍許令本處鄉試照  
例出身今後教官俱於副榜舉人三十歲以上者選  
除庶幾學校得人而人才有所造就若山林中果有  
隱居行義不求聞達年四十以上學識卓異之人須  
方面府州縣官公同舉保風憲覆實送部嚴加考驗  
然後錄用如有不實罪坐舉主

題用賢事

商輅

臣切照見任春坊司直郎林聰原籍福建人由正統四

年進士歷任刑科都給事中陞今職本官學識優長操持端潔存心公正遇事敢言先在刑科衆皆推服今任司直郎固是美職但所任政務頗簡未免以有用之才置於閒散之地況今吏科都給事中張某久病不出如蒙乞降特旨着林聰兼吏科都給事中管事如此則恩出於朝廷非惟本官益竭忠誠勉圖報稱凡有言責者亦皆聞風感激各思自效矣且今春坊官員多係翰林等衙門兼職林聰原係都給事中今令以司直郎兼之



俸祿無增品秩仍舊於事體無損於政務有益且使中外人聞之皆謂陛下誠於求言善於用賢所謂用一人而千萬人悅豈不美哉臣職居近密偶有所見不敢緘默

覆給事中韓鼎公選法奏狀

王恕

文選清吏司案呈奉本部送禮科抄出禮科給事中韓鼎題云云等因具題奉聖旨該衙門看了來說欽此抄出送司案呈到部看給事中韓鼎所言考選監生出論

有請客之名要行出判語及令親供一節臣等議得考監生出論題觀其作文以第高下此舊規也奈何所考監生賢愚不一能者依經傍註一篇可成不能者閤筆凝眸一辭莫措却乃不依本題別寫他作故人謂之請客此等之人固不當取但人才難得是以或觀其寫字或觀其人物而次第之以備下僚末職之用未嘗有棄才也若與能者出論題與不能者出判語是使學者皆記判語而不學作文非法之善也合無今後考選監生

聽本部出題取其文理平順者為一等文理頗通者為二等文理不通若寫字人物有一可取姑以入選如此則考選有方而高低自別矣其言各部主事等官有歷俸三年二年未及二年而驟陞者有七年八年或九年將滿而纔陞者拘於各部似乎不公要照郎中林鑒等調改復除事例不分本部別部以歷俸年深者陞用一節臣等查得往者各部缺官若本部有相應人員就於本部陞用無相應人員方於別部陞調此見行事例若

戶部郎中林堃員外郎吳裕調吏部是也若但以歷俸年深為主不分清濁勤惰一槩更調如歲貢例不無賢否混淆紛更太甚合無今後轉陞官員如某部缺郎中員外郎先儘本部年深相應員外郎主事銓補如無相應者則於別部年深相應員外郎主事調補如此則選法公而人心勸矣其言旌異推舉有舉取未成而問發為民者有旌異方畢而問發充軍者有行取到部調除原職者要行連坐舉主一節所言有理合無今後在外

官員果有廉能公正政蹟卓異聽巡撫巡按等官從公  
旌舉各注舉主於旌舉官員之下日後犯賊連坐舉主  
如是庶幾舉能其官用得其人矣緣係陳言公選法及  
奉欽依該衙門看了來說事理未敢擅便具題奉聖旨  
是欽此

議都御史邊鏞保治奏狀

弘治元年

王恕

文選清吏司案呈奉本部送禮部咨該都察院左副都  
御史邊鏞奏云云等因具本奏奉聖旨這本所言該衙

門看了來說欽此欽遵抄單移咨送司案呈到部當本  
官所言任賢以遠奸諛等六事逐一看護明白各開前  
件伏望聖明裁處緣係節該奉欽依該衙門看了來說  
事理未敢擅便具題奉聖旨准議欽此

一議得君子小人迭為消長君子進則小人退小人進  
則君子退自古未有用君子而不治用小人而不亂  
者也且執德守義正直中和者君子也巧言令色便  
僻側媚者小人也但君子難親而易踈小人難踈而

易親陛下新服厥命固嘗用君子而退小人矣今都御史邊鏞拳拳以是為言者第恐君子雖用而信任不專使小人得以間之終不能成其治小人雖退而屏逐不遠復將夤緣復進終有以害其政夫知其為君子而任之則不必致疑知其為小人而去之則不可復用如是則正人立朝而萬邦咸休矣

一議得都御史邊鏞所言納諫以廣言路一節誠人君為政第一事也陛下嗣位之初嘉言無不納善政無

不舉弊政無不革臣無不悅服若李文祥之奏疏  
其意雖忠直其言則逆耳陛下畧不加罪但除事繁  
縣佐使之歷練以成就之恩莫大焉不知者以為貶  
李文祥以箝言者之口此邊鑪所以為陛下言之合  
無准其所言行取李文祥前來照依甲等資格改除  
在京事繁衙門使之歷練以成其德器一釋衆人之  
惑一全納諫之名不亦善乎

一議得勸懲者人君之大柄所以歆動人心而警懼天



下者也今都御史邊鏞所言別善惡以昭勸懲一事  
誠為有理臣等又聞古人有言賞必自踈遠始罰必  
自貴近始賞自踈遠則賞一人而千萬人勸罰自貴  
近則罰一人而千萬人懼陛下若納邊鏞之言用古  
人賞罰之法則善無不勸惡無不懲而天下治矣

一議得名器者人君之至寶所以彰有德而別有能若  
不擇其人而授之則奔競之風起而廉恥掃地矣其  
何以為國乎陛下新服厥命擯斥奸佞惟賢是用固

未嘗以名器假人矣今都御史邊鏞猶以是為言者  
但恐寡廉鮮恥之人尚在投間抵隙之言未絕惟願  
陛下始終此心始終此政杜絕先容之私言自無倖  
進之妄人夫如是又何患名器之不重而朝廷之不  
尊乎

一議得都御史邊鏞所言乞勅巡撫巡按等官嚴加訪  
察守令務致的實名著循良者指實具聞即便擢用  
而無拘乎資格政果貪酷者據實訊問即便罷黜而

無待於朝覲其守令之中尤有循良之最者書於御  
屏或錫車服以彰其能一節查得節次詔書與夫巡  
撫都御史勅諭并本部奏行事理其於守令之賢否  
俱有旌擢黜退之典今邊鏞復以是言之者蓋是巡  
撫巡按等官奉行未至合無通行各處巡撫巡按官  
查照節次詔書并勅諭及本部奏行事理嚴加訪察  
知府知州知縣等官某人廉能公正某人貪酷害民  
某人罷軟無為某人年多有疾當旌擢者具其政蹟

奏聞當獎勸者畧為獎勸當拏問者就行拏問當黜退者就行黜退當致仕者勒令致仕務在至公不許顛倒是非致紊勸懲之道自取失職之譏

一看得都御史邊鏞所言陛下於文武大臣之中留神俯察其才能性行孰可宰銓衡孰可總風紀孰可為大將孰可為副參孰可撫安一方孰可守鎮要地既即事以驗其才再因才以授其職不因瑕以掩瑜務舍短而求長一節誠為簡法但自正統年間以來每

日止設一朝或兩朝每一朝臣下進見說事不過片  
時聖主雖聰明豈能盡識盡察不過寄聰明於左右  
之人大臣於左右之人相見者不多左右之人亦豈  
能盡察識諸大臣之賢否亦不過寄聰明於門客門  
客之識見未必盡合公論或得之毀譽之言或出於  
好惡之私是以以直為枉以枉為直者多欲察識之  
得其真必須陛下日御便殿宣召諸大臣與之講論  
治道謀議政事或令轉對或閱其章奏如此非惟可

以識大臣而隨才任事可以啟沃聖心日進於高明矣

論王府保舉官員奏狀

弘治元年

王恕

文選清吏司案呈奉本部送內府抄出淮王奏云云等因具奏奉聖旨吏部知道欽此欽遵抄出送司查得劉奎某府州縣人由生員成化二十一年七月遇例納銀送南京國子監放回依親讀書至今方纔二年有餘及查本部聽選監生自入監歷事以來守候十八九年方

得除授今劉奎之為監生未及三年輒便希求保舉圖任伴讀若准所保不無遂其僥倖之計阻滯年深之人及查得天下王府二十五處額設官員不為不多除良暨典膳典樂外其餘俱係常選官員近年以來遇有缺員往往奏保或稱妃兄妃弟或稱儀賓親屬與凡相熟之人不論可否一槩奏保任用實壞選法阻滯常選之人案呈合無今後王府官有缺該長史司便呈報各該布政司轉達本部照缺於監生吏員內相應人員銓補

不許仍前奏保攬越仕籍阻壞選法如此則奔競者不得倖進守正者免其嗟怨仍行各該布政司啟王知會緣係乞恩保舉官員及奉欽依吏部知道事理未敢擅便具題奉聖旨是欽此

議僉事林淮願就教職以便養親奏狀

弘治元年

王恕

文選清吏司案呈奉本部送吏科抄出雲南按察司僉事林淮奏云云等因奉聖旨吏部知道欽此欽遵抄出送司案呈到部看林淮奏稱雲南路遠母老不堪就養



辭官則家貧難供朝夕乞要授以本處或附近府縣學  
教授教諭以便養母一節情實可矜況本官辭尊居卑  
辭富居貧豈得已哉合無俯順其情授以附近地方府  
學教授職事令其到任以便養親親終仍除僉事職事  
一以慰本官母子之情一以為臣下忠孝之勸等因具  
題奉聖旨是欽此欽遵今查得直隸常州府儒學見缺  
教授一員欲遵奉欽依事理將林淮准除授常州府儒  
學教授順賚文憑令其到任管事未敢擅便具題奉聖

旨是欽此

選用新舊進士兼懲規避奏狀

弘治元年

王恕

照得舊例進士登科之後自本年至第三年第二甲進士內則選主事等官外則選知州第三甲進士內則選評事行人等官外則選推官知縣至第四年不分二甲三甲俱選主事等項京職以其辦事年久故也成化十二年取進士三百名存留一百名在各衙門辦事餘皆放回依親讀書已經二次行取除已到選用其見在外

尚有四十餘員未到即今在外缺知縣推官共七十餘員欲將見在二十年舊進士擬除補缺緣係舊進士去年已不選外任俱授京職今在舊進士比之先授京職者辦事聽選又多一年若選外任揆之人情實有不堪比之舊例亦不相同合無將二十年見在舊進士照例挨次俱除京職將二十三年第三甲新進士除在外知縣推官并在內行人待舊進士選盡却將第二甲新進士於內外相應員缺內相兼選用所據舊進士除到外

其行取不到者似有躲避外選情弊合無除丁憂事故外其餘無故至今不到以後到部之日俱除外任庶幾銓法無私人心有警緣是選用新舊進士事理未敢擅便具題奉聖旨是欽此

議左都御史馬文升陳言裨益治道奏狀

弘治元年 王恕

文選清吏司案呈奉本部送准禮部咨儀制清吏司案呈奉本部送禮科抄出都察院左都御史馬文升奏云云等因奏奉聖旨這本所言多切時弊該衙門便看了

來說欽此欽遵移咨送司案呈到部看得馬文升所奏  
選賢能以任風憲等四事誠如聖諭謹議開坐前件伏  
乞聖裁緣係節奉欽依該衙門便看了來說事理未敢  
擅便具題奉聖旨准議欽此

一查得舊例御史員缺於各衙門辦事半年以上進士  
及本部聽選舉人監生并行人博士推官知縣教官  
內選補至成化六年以後拘於正統年間頒降憲綱  
新進初仕不預選任近該南京禮部精膳清吏司郎

中李諒陳言本部議擬今後選用御史於在京各衙門辦事進士與夫曾經一考稱職行人博士及進士舉人出身推官知縣內選年三十以上五十以下人物端莊言語正當操行廉潔才識優長者送都察院理刑半年滿日聽本院考察各註考語連人送部諳曉刑名堪任御史者奏請照缺選補但知縣推官係在外官員訪查未詳合無通行各處巡撫都御史巡按御史各於按屬進士舉人出身知縣推官內從公

推舉如前相應之人備開脚色政績具奏以憑遇缺  
行取兼進士行人博士選送理刑不許舉非其人已  
經題准欽遵外今馬文升又奏前因誠為選用風憲  
之良法但恐遇有御史缺多六年以上知縣二年以  
上進士內相應之人數少必待其有然後選用不無  
悞事合無通行各處巡撫都御史巡按御史并布按  
二司官各於所屬曾經一考稱職進士舉人出身推  
官知縣內推舉年三十以上五十以下人物端莊言

語正當操行廉潔才識優長者備開脚色政蹟具奏  
籍記在部遇有御史員缺先儘六年以上行取前來  
相無二年以上進士并一考行人博士選送理刑半  
年滿日聽本院考察各註考語連人送部選用如無  
相應六年以上知縣推官二年以上進士仍依本部  
議擬奏准事例於半年以上進士曾經一考稱職推  
官知縣內選用如此則選用亦可以得人風憲不至  
於久缺矣



一查得舊例按察司官有缺於法司屬官內推補其知府同知推官知縣有原係法司出身及曾在法司辦事者亦得推補如蘇州府知府林鶚推補江西按察使寶抵縣知縣葉淇推補廣西僉事是已至於斷事理問推官有缺本部臨時斟酌選用而法司辦事進士歷事舉人監生居多但進士及舉人監生俱是挨次取選而舉人監生又係臨選考校或前或後人缺有不相當難以一一照缺對人除補今馬文升奏稱

前因合無今後按察官有缺先儘法司相應屬官推補其知府同知等官果有諳曉刑名政聲卓異者亦得量才推舉斷事理問推官有缺先儘法司辦事進士歷事舉人監生除補次及相應人員所言不許差占斷事理問推官有悞問刑一節係見行事例但各該官司奉行未至或遇急切公務往往差遣委的有悞問刑合無行都察院轉行各處巡撫巡按及布按二司今後不分大小公務俱不許違例差遣斷事理

問推官妨悞問刑如此則司刑得人刑不枉濫矣  
一查得舊例知州知縣缺少本部於當選內將該選進  
士監生及該陞官員除補如遇缺多照依大學士李  
賢奏准事例將聽選監生舉人不分年月遠近揀選  
考補近該成化二十三年朝覲考察黜退天下知州  
知縣數多本年四月內於常選外將聽選舉人監生  
照例揀選考試除補知州知縣共一百九十五員給  
憑赴任去訖餘有員缺常選陸續除補但州縣數多

隨補隨缺未能得完人民繁夥錢糧浩大去處知州  
知縣實難其人本部已經題准將成化二十三年第  
三甲進士取選兼同舉人監生及該升官員通行除  
補外候員缺數多仍照前例揀選除補所言四川雲  
南廣西福建路途險遠若待缺到除官不無太遲要  
行先期除官頂補固為有理若不查勘應否一槩扣  
缺除補恐前官中間亦有事故一年之上未滿後官  
將帶家小守候日久不得支俸管事衣食不足求其

不為奸民猾吏所餌斯亦難矣合無通行巡撫巡按  
官將所屬州縣正官二考之上九年將滿者按季查  
奏開具各官歷俸及該滿年月以憑斟酌遠近除補  
及將新除官員訪察敢有過家留連不即到任者查  
照成化六年三月內本部奏准選授外任官員過違  
憑限半年之上不到任者雖有中途患帖不准照例  
問罪過一年之上者不許到任起送革職為民事例  
施行若在中途及任所事故去任者所在官司并原

任衙門即時具由通行合于上司及徑申本部知會以憑作缺銓補其言布政使按察使知府所係甚大尤宜慎選一節本部遇有前項正官員缺未嘗不廣詢博訪慎擇其人二司正官每員推舉二員請旨簡命一員知府亦精擇一員請旨陞用自今以後益當盡心推選以求無負委任如此則正官亦可得人庶政不致廢墜矣

一查得舊例兩京各衙門屬官三年六年九年考滿先

從本衙門堂上官考覈送都察院覆考又送本部覆考從而黜陟以示勸懲近年各司因循苟且所出考語不辨淑慝虛應故事及其覆考得實其平常官員輒便造謗摭拾以致考覈不行無所勸懲誠如左都御史馬文升所言合無通行兩京各衙門知會今後屬官考滿堂上官務秉至公詢訪得實出與考語善善惡惡定為確論送都察院并本部覆考如原來考語平稱得當續出考語不嫌雷同若有不當聽覆考

官從公考覈其被考平常之人敢有仍前造謗撫拾  
許御史等官指實劾奏拏問平常者降調外任有賊  
者罷黜為民若覆考挾私不公一體治罪其有前考  
平常後考中間能深自懲艾勉於為善者亦宜書稱  
前考稱職後考中間放肆改節者亦書平常以憑黜  
陟如此則勸懲無私而官僚知儆矣

議戶給事中王珣陳言時務奏狀

王恕

文選清吏司案呈奉本部送准禮部咨戶科右給事中



王珣奏云云等因具奏奉聖旨該衙門知道欽此欽遵抄出移咨送司案呈到部查得見行事例取選考試舉人監生文理平順者多相應除授府佐知州知縣等官職事歲貢應例監生文理平順者少相應除以縣丞主簿等官職事但歲貢應例監生視舉人監生數多上選之時不得均勻舉人監生有接連五七十名者亦有百十人中舉人不上十數名者若前項府佐州縣正官缺多舉人該選者數少未免將歲貢應例監生除以府佐

州縣正官若前項缺少舉人該選者數多不免將舉人除授縣丞主簿等官例此而行似未停當及查得成化十五年考選南監監生余紹夔等止百人有八十二人俱是舉人若欲一例取選一時豈有許多府佐知州知縣不無亦選縣丞主簿等項職事未免有枉才小用之謂今右給事中王珣要將舉人遴選另置小簿遇州縣正官府佐二員缺挨次銓補似為有理但歲貢應例監生內亦有可用之人若將舉人另置一簿不惟立法

太拘抑恐起人爭訟况前項選簿資次已定相傳已遠  
遽難更動合無將聽選舉人監生照缺斟酌取用如相  
應員缺數多則量為揀選多取幾人相應員缺數少則  
少取幾人餘者存留以待下選所取舉人與同歲貢應  
例監生一體考試其歲貢應例監生若有文理平順考  
在優等者亦授以府佐州縣正官舉人或文理不通考  
在中下亦以縣佐等項職事擬除如此庶使選法公而  
得器使之宜人心平而無咨嗟之聲緣奉欽依該衙門

知道事理未敢擅便具題奉聖旨是欽此

議給事中林廷玉陳言劾奏狀

弘治元年

王恕

文選清吏司案呈奉本部送吏科抄出吏科給事中林廷玉題云云等因具題節該奉聖旨這本所言該衙門看了來說欽此欽遵抄出送司案呈到部除明賞罰以振軍旅六事係戶兵等部掌行外今將本部合行革宿弊以清吏治等四事逐一議擬各開前件伏乞聖明裁處緣係節奉欽依該衙門看了來說事理未敢擅便具

題奉聖旨准議欽此

一查得成化十四年該辦事吏吳鵬奏稱近年以來有等無藉之徒遇該役滿指以清卷為由潛住公廨營謀聽缺農民或考退生員頂補希求賄賂要銀一百五十兩名頂頭房錢設有貧難無錢者逼迫無奈儘將產業變賣或揭借錢財轉數出與頂頭以致迺相倣習以為常此等之徒著役之後甚至壞法害民以償私債迨堪充無碍之人懼法不服出銀者反被

捏造過惡赴堂執稟官不知情就行黜退若此之類  
不可枚舉乞行禁約今後吏典役滿即將見行文卷  
交與同房書典當日起送出司如再托故延住取討  
頂頭房錢者通將受財并出錢過付之人各論以枉  
法贓罪永行遵守本部已經議擬題准通行禁約去  
後今給事中林廷玉又題前因合無准其所言通行  
內外大小衙門如遇叅充吏典該管官員務要嚴加  
禁約隨用新叅吏典叅充替役不許舊役吏典夤緣

交通索取頂頭錢銀敢有不遵仍蹈前非事發與者受者及過付之人俱依律究治其該管官員知而故縱一體治罪在內令錦衣衛巡捕官校嚴加緝訪在外聽巡按御史糾察如此則宿弊革而吏治清矣

一看得給事中林廷玉題稱近來納粟監生數多彼既以財出身得官豈不拔本生民被其魚肉要預先立為上中下三等於臨選之時吏部出題嚴加考試文理通暢者為上文理稍通寫字端楷非請客者為中

不諳文理寫字粗拙請客者為下上中二等量其高下與科貢一體選用下等者填註衙門職名令其冠帶閒住行移國子監及天下學校省諭各生知會使知各加勉勵奮志進學以收後效如此庶幾臨時不悞士子而將來官亦得人矣

一看得給事中林廷玉題稱教官陞用太拘以致豪傑不就貢途充位生員無所取效要將天下教官今後俱於舉人除授六年有功蹟照例會試九年考滿若



無功蹟依舊銓選但有功蹟者俱量陞有司相應職事其歲貢出身之人不必除授教職一節除六年有功蹟許令會試九年有功蹟者量除有司職事俱係見行事例別無定奪查得天下教官五千有餘逾年取中副榜舉人雖有千餘其間有例不該就教職者十有六七該就教職者不過二三百名豈能完補前項教職員缺其言九年無功蹟者依舊銓選有功蹟者俱量除有司相應職事切緣祖宗舊制教授舉人

五名該陞舉人四名三名本等用舉人二名以下降  
學正舉人全無考通經降訓導學正舉人三名該陞  
舉人二名本等用舉人一名降訓導舉人全無考通  
經降訓導教諭舉人二名該陞舉人一名本等用舉  
人全無考通經降訓導訓導舉人一名該陞舉人全  
無考通經降邊遠學校訓導其教授以下若不通經  
俱降河泊所等官百有餘年率用此道若將無功蹟  
教官依舊銓選不惟有碍舊制抑且人心無警且各

王府審理紀善伴讀教授及國子監博士助教等官  
各府州衛儒學教授舊制俱該九年考滿有功蹟教  
官陞用若將前項教官俱量除有司職事第恐各王  
府并國子監前項教職員缺無從銓補况教官中間  
雖有功蹟而年貌才調未必皆堪任有司之職合無  
今後教官九年考滿仍遵舊制第為陞降其該陞之  
中學行超越者授以知縣其次授以博士等官歲貢  
等項監生願就教職者本部及翰林院嚴加考試務

要精通三場者授以訓導其文理生澁者不得濫竽其間如此則教官亦可以得人生員不至於無教矣一查得成化二十一年該本部題為缺官事當將刑科都給事中盧瑀陞除湖廣長沙府通判給事中秦昇陞除四川順慶府廣安州同知工科給事中童祝陞除湖廣武昌府興國州同知及查得成化二十二年為急缺紗綾紙劄事將御史劉俊調除福建邵武府光澤縣知縣訖近該本部題內開給事中御史調外

任該陞一級降外任該對品調任者有相應員缺就  
行除授知縣同知官職事無相應員缺者陞俸一級  
仍令照舊管事其前項兩京給事中御史并文職奉  
特旨調任降級者內果有才識超卓遇有相應員缺  
陸續量才舉用已將劉俊陞俸一級仍舊管事候有  
相應員缺量才舉用外為照府通判盧瑀州同知秦  
昇童祝又有原任禮科都給事中蕭顯陞除貴州鎮  
寧州同知浙江道御史汪奎陞除四川夔州府通判

俱係先年陞用官員比之因事降調者不同以此未  
及舉用今給事中林廷玉言盧瑀童祝泰昇雖係陞  
遷但當時欲斥逐而難為名故假此以陰寓意耳要  
將各官量為陞用合無准其所言將各官並成實蕭  
顯汪奎仍照本部題准事例再行訪察如果才識超  
卓遇缺量才陸續舉用如此庶幾屈者以伸而下無  
遺才矣

陳言輔治奏狀

王恕



監等官非歷練老成雖有聰明才俊亦不輕授近年以來則不然矣前者陛下將內官論年遞降蓋矯往年濫陞之弊欲復祖宗之舊制誠是也臣於病中風聞近日又陞一起內官其數頗多不知是前日遞降者不知另是一起也前既以為濫而遞降之今何不以為濫而復陞之似乎不可舉措如此其何以示天下陛下嗣位之初人心歸向如古之二帝三王本朝太祖太宗復見於今日莫不稱頌而愛戴之蓋聞陛下在青宮時存心正



大不喜聲色不貴貨利及登寶位又罷貢獻織造屏去  
一應珍奇玩好之物治近習蠹國亂政邪術欺君罔上  
之罪并逐喇嘛番僧法王佛子國師革罷傳奉冗員追  
回濫賞莊田蟒衣等項裁抑奢侈奔競凡此數事皆壞  
名器損國體傷民財臣民所不欲而不能革非一日矣  
陛下一旦而盡革之此天下臣民所以稱頌而愛戴之  
也夫何未久而又濫陞內官如此若復濫賞莊田蟒衣  
將見前數事不數年復如舊矣欲天下臣民稱頌而愛

戴之如今日後不可得此天命去就人心離合之機也  
可不慎歟況今北敵在邊災異迭見此正君臣上下同  
加修省之時而國政如此其何以服遠人而弭天變伏  
望陛下自今伊始於出入起居之時發號施令之際務  
要惟精惟一允執厥中遠宗堯舜之道近守祖宗之法  
決不可為巧言所惑蹈襲前事上拂天意下失人心而  
為社稷憂臣誠激於中詞不能婉干冒天威無任戰慄  
隕越之至等因具本奏奉聖旨這起內官隨侍春宮年

久因遇節日各量陞一級了罷欽此

覆大理寺右寺丞楊澄鑒別大臣奏狀

弘治元年 王恕

文選清吏司案呈奉本部送准禮部咨禮科抄出大理寺右寺丞楊澄奏云云等因具奏奉聖旨這本所言該衙門看了來說欽此欽遵抄出將專委任以禮大臣一事移咨送司案呈到部臣等看得楊澄所言乞要陛下將內閣并在廷文武大臣一一重瞳鑒別果有年力衰憊庸庸保祿不堪任事者以禮罷去其老於閱歷明達

世故可備顧問計大事決大疑者亦宜曲力庇覆而優容之少賜宣召而寵異之勿因小嫌而阻其志勿以小過而挫其節一節經傳載之而有成說歷代行之而致成效非無稽之言弗詢之謀可比也然所以體而行之在人君而非臣下之所敢言也伏乞陛下因楊澄之請將見任大臣再加鑒別可者任之其不可者罷去之既任之將以計大事也則小嫌宜在所畧將以決大疑也則小過宜在所容人言當恤報私仇而陷排之者不可

不察衆論可采執偏見而非毀之者不可不辨機密之事賜以手詔激切之情許之面陳必如朱熹所謂任則勿疑疑則勿任此聖君賢相所以誠意交孚兩盡其道而以共成正大光明之業也書曰任賢勿貳去邪勿疑願陛下大書於座右時加省覽緣係陳言脩省及節該奉欽依該衙門看了來說事理未敢擅便具題奉聖旨是欽此

議太常寺缺官供祀奏狀

王恕

文選清吏司案呈奉本部送吏科抄出太常寺掌寺事  
太子少保禮部尚書劉爰等題云云等因具題奉聖旨  
該部看了來說欽此欽遵抄出送司查得徐啟端原任  
司樂傳陞協律郎王福廣等一十三員俱由樂舞生傳  
陞協律郎等項官職成化二十三年九月該科道官陳  
言要將傳奉濫設官員通行查出罷歸原籍閒住等因  
節該奉聖旨是原有官陞職的三品四品降正從六品  
五品六品降正從八品七品以下降雜職樂舞生道士

出身的冠帶閒住都不用再求進用欽此欽遵外今該前因案呈到部看得具官劉岌等題稱本寺缺官供祀要將徐啟端仍復司樂其餘王福廣等月支食米聽候差委祭祀一節先因內外奔競無恥之徒夤緣梁芳等傳陞京職日積月累遂至千數百員費耗錢糧濫占皂隸不可勝紀互相交結以邪妨正又不可言三五年來名器大壞物議不平仰惟皇上嗣位之初首罷傳陞官員朝野為之改觀人心無不痛快迄今一年有餘事體

方定奔競稍息今劉岌等却要將徐啟端等復職食糧是為傳陞官員立赤幟也若復用一人則數千百人皆相率而來豈勝煩擾豈不壞朝廷清明之政失萬邦黎獻之心所言難准且三年一次致祭岳鎮海瀆歷代帝王俱遣樂舞生行禮若謂金山等處墳所四十五處祭祀官少不敷差遣照例差樂舞生行禮亦無不可何必開已閉之倖門引既退之小人然而此舉非真為缺官供祀蓋是徐啟端央浼劉岌等假此為名以求復進非



惟啟此弊端抑且故違詔旨所據徐啟端等俱合拏送  
法司明正其罪以為傳陞降革再求進用者之戒劉爰  
等亦合有罪緣劉爰等俱係京堂上及京官奉欽依看  
了來說事理未敢擅便具題奉聖旨是徐啟端等本當  
拿問且都饒這遭劉爰等罷欽此

議徽王乞陞鈞州為府奏狀

王恕

文選清吏司案呈奉本部送准戶部咨河南清吏司案  
呈准工部營繕清吏司手本奉本部送內府抄出徽王

稱名奏云云等因奏奉聖旨該衙門看了來說欽此欽遵抄出送司照得改作衙門係隸別部掌行除稟堂外合用手本前去戶部該司呈堂施行等因到司案呈看得前項改陞衙門一節比與臨清縣陞州事體相同係隸別部掌管難以施行合就移咨徑自施行等因到部送司案呈看得徽王所奏除修築城池及改挑河道俱係工部掌管除行該部徑自施行外其稱分封寥落州治要將鈞州改陞為府治就於郭內添設一縣并前項

有名州縣一體所轄一節臣等體得肅府見在陝西蘭州藩府見在山西路州荊府見在湖廣蘄州岷府見在湖廣武崗州立國多者八九十年少者亦不下四五十年率皆仍舊未嘗改為今徽府要將鈞州改為府治又要將汝州郊縣魯山寶豐商州許州襄城長葛臨潁郟城鈞州密縣新鄭縣一十二州縣改隸所轄不惟異乎前四府仍舊之撰且啟前四府改為之端況今各處災荒軍民凋弊欲興此役實非所宜兼且州之與府於王

頗無所與改與不改於王似無重輕以此言之不如仍舊貫之為善也臣等愚見如此未知是否緣係欽依該部看了來說事理未敢擅便伏乞聖裁具題奉聖旨是不必改陞還寫書與王知道欽此

會議僨運糧儲行移奏狀

弘治二年

王恕

文選清吏司案呈奉本部送准禮部咨該本部等衙門題刑科抄出都察院左副都御史邊鏞等題湖廣道呈刑科抄出總督漕運兼巡撫鳳陽等處都察院左副都

御史秦紘奏湖廣等處承宣布政使司呈蒙巡按湖廣  
監察御史姜洪批允軍糧米本院節行會奏去訖布政  
司星馳差人咨稟淮南總督漕運官尚早處治毋得臨  
期致誤國用備申轉呈臣處照詳處置施行備呈得此  
臣查得淮安徐州臨清德州四處水次倉糧數少雖各  
該衛所運糧官軍行糧尚不勾用又況臣撫屬地方亦  
有災傷但於內酌量輕重那移輾補今亦未完其湖廣  
布政司前項允軍糧米無從措置除行本部布政司計

處外為照各處巡撫都御史與巡按御史行事雖不相  
關而名分終難紊越每見各處巡按御史與巡撫都御  
史移文有令按屬衙門抄案轉達此於名分雖乖猶以  
敵體相待今看得御史姜洪前項批詞玩其語意乃是  
以上司督臨屬官名分倒置如此顯是姜洪不諳大體  
如蒙乞勅都察院將御史姜洪拏問明正其罪以為越  
禮犯分之戒及行令各處巡按御史今後凡與巡撫都  
御史有行仍照行移體式徑自具呈不許出案轉達庶

使名分正而體統嚴等因具本該通政使司官秦奉聖  
旨都察院知道欽此欽遵又該刑科叅看得監察御史  
姜洪批詞既曰星馳差人又曰咨稟其下文母得致悞  
等語乃為布政司而設今都御史秦紘以此自認怒目  
不明輒便叅奏自傷大體事屬紛擾宜從抄出施行通  
抄具呈到院看得具官秦紘叅奏御史姜洪前項批詞  
云云一節已該刑科叅看得監察御史姜洪批詞云云  
事屬紛擾詳此叅詞姜洪似為無罪難以提問及查得

行移體式內止開各道御史及巡按御史呈都察院并無巡按御史具呈巡撫都御史詞語其巡按御史出案轉達巡撫都御史揆諸事體亦無妨碍今要徑自具呈行移體式既不該載亦難擅擬為例所據都御史秦紘該刑科叅出前項紛擾情節合當查究但本官近陞右都御史巡撫兩廣去訖伏乞聖明裁處緣秦紘係在京堂上官及奉欽依都察院知道事理未敢擅便具題奉聖旨這本係干名分大體禮部便會各部通政司大理



寺堂上官從公看了來說欽此抄出到部會同吏部等衙門太子太保尚書等官王恕等查看得行移體式各道並巡按御史具呈都察院雖無巡按御史呈巡撫都御史之文緣巡撫都御史亦係本院堂上官相應具呈但在外巡按御史有具呈者有抄案轉行者今巡按湖廣監察御史姜洪批詞布政司星馳差人咨稟淮安總督漕運官尚早處置毋得臨期致誤國用委的詞語欠遜有失大體及刑科并都察院叅奏都御史秦紘自傷

大體合當查究等詞不無偏向俱各有罪所據御史姜  
洪刑科經該官都察院僉書官吏通該查究提問合無  
今後巡按御史事與巡撫都御史相關者仍照行移體  
式一體具呈庶幾名分攸存體統不紊緣事內干碍在  
京堂上官並京官及節該奉欽依禮部便會官從公看  
了來說事理未敢擅便具題奉聖旨是姜洪批詞欠遜  
有失大體難居風憲對品調外任刑科都察院經該僉  
書官吏偏向不公本當提問且饒這遭各罰俸糧一箇

月欽此欽遵擬合通行除外合行就移咨欽遵施行等  
因送司案呈到部看得御史姜洪係正七品今對品調  
外任該除在外正七品知縣職事查得山西平陽府解  
州夏縣見缺知縣一員欲將姜洪調補前缺順齋文憑  
令其就彼到任管事未敢擅便具題奉聖旨是欽此



名臣經濟錄卷十六